

庸庵文編

庸庵文編卷二

無錫薛福成叔耘

中興敘略上

戊辰

昔我

文宗顯皇帝初嗣服。廷臣黼黻右文。眇遑遠略。各行省大府。迨郡縣吏。瞢於利弊。恪守文法。以就模式。不爽銖寸。泰極否生。兆於承平。時則羣盜洪秀全等。反於粵西。恃桀騁狂。闕礙非常。疆臣致討。匝歲益橫。

天子乃簡元輔爲經略大臣。授鉞南征。當是時。頒內府金給饋餽。無慮千萬。徵集緣邊諸宿將。滿漢各營勁旅。

暨東三省鐵騎。隸戲下。兵衆饒饒。翦兇豎。宜若反手。然而賊以死黨數千。馳踞邊城。陸梁睢盱。忽伏忽突。矚瑕蹈便。宵軍我軍。天不佑順。良將勁卒。損折過半。賊始收吾軍實。圍我桂林。迫我長沙。殘我武昌。徇我九江。鼓脇徒衆。舳艫蔽江。東下未浹月。而金陵又告陷矣。自賊起。孤寇選王師。一歲間。焱馳行省六。輔名城數百。戕賊顯官。衆暴至數十百萬。民以大困。夫豈賊始謀及是哉。毋亦當事二三大臣。爲謀不臧。釀激退避。以至是也。賊旣覆金陵。據爲僞都。侵下旁郡邑。別遣賊數萬渡淮。北瞰中原。犯畿甸。一軍泝江西上。復收安慶九江。再擾湖南。

北由是海宇幾無完土。適會今侯相曾公以侍郎居憂在里奉

詔哀義旅討賊。連戰皆大捷。收奪荆山以南失土。乘勝席卷而東。與賊相持江潯。

朝廷亦命科爾沁忠親王討賊之北犯者。圍而殲諸山東境。賊燄少熄。然當此之時。賊猶控據長江。橫溢四出。覆城殺將無虛日。環寇之師且十萬。遞勝遞負。無寸尺功。相拒守閱八年之久。日以媮翫。賊因詭道擣我杭郡。俾我精銳南趨。乘間襲吾戎壘。師燿帥殉。列城崩潰。乘勢脇略。盡收吳浙膏腴地。子黎孤城。喁喁北望。於是曾

公始受東征之

命。當是時，自皖江以西屬之潛霍，北跨淮淝，東並江入海，南踰浙水及括蒼，皆粵賊。劍閣以南訖於滇黔，土寇錯起如蝟。苗回諸賊，嘯踞蠻洞。中原西自陝洛，南帶淮泗，北距河東，苞汝濟，傳於海，撚寇跳踉其中，與粵賊相表裏。而西洋島族，乘釁騁變，更相與合從內嚮，震我京師。

天子北幸於灤之陽，全局岌岌，天下震駭。然而曾公以部卒萬人渡江，馳入祁門，塹濠扼險，且守且戰。羣孽望風授馘，喪膽宵遁，遂收我皖南地，進拔安慶而建節焉。

文宗顯皇帝崩

今天子卽位旋蹕京師兩宮

皇太后垂簾訓政勤勤求治靡有劾意內誅僭竝外慘
戎帥之不職及跳奔者乃益倚任曾公授之相位東南
軍事咸命節制當是時朝廷大事及天下有大黜陟必
以諮曾公曾公竭誠靡隱算無遺策爰薦李公帥吳左
公帥浙分兵餽饗授以節度俾介弟中丞公躬統雄師
長驅東邁連拔沿江堅城名關數十旬月間收地千餘
里徑造金陵城下賊震栗失措連喉吳浙之賊大舉奔
援死咋不能齟吾壘李公左公則以其間恢吳浙地賊

既喪吳浙勢益孤食益乏曾公復自上游分遣水陸之師數道並進遂合金陵之圍苦攻不解卒摧崇墉梟元惡分軍四出蕩滅遺燼自是南戒無事矣乃悉移其甲兵財賦以北逐撚寇盡殪其魁中原綏謐西洋之人亦且讐慄弭伏不敢敗和議俾我得以專力西征則苗回之平可企足待也夫以一二桀猾之徒煽邪誘蒙以干天常傾天下全力未能勝挫衄甚矣及夫狂氛益張外訐內憂相挺而作顧乃撫創殘之地召未訓之士鼓行前進掃除數百萬狺狺之豺虎而滅其景跡數年之間區宇奠定如故獨非人事邪傳曰得人者昌豈不信哉

因敘其大略如此

中興敘略下 戊辰

粵孽肇釁毒延寰區毅卒武師折北不救守置大吏往往連城百數聞變周章卒以跳奔致寇或乃與時進退張虛級以誑取功賞卽有一二才傑之臣躬與其間大都挫抑壅闕百無一施甚者相牽率以抵於敗幸而不敗則亦困而後濟僅以搢持一二坐視寇之燎原而莫之遏以救吾民也若是者何哉承平旣久人卽晏安賢才日以衰息當事者旣莫之能倡才稍稍出而又莫之能用故也若夫鼓召儁雄參合智能以光輔中興之業則惟今相國曾公實倡於始實挈其成公之初起兵不

滿萬進與賊還丰采隱然動天下而尤以知人名當是
時朝廷用人及天下所屬望皆以曾公一言爲重凡天
下驚異閎駿非常之才雲合而景附其所舉至建牙開
府者踵相接以起若其訓兵積粟雄峙上游扶贊賢傑
布之海內身處一州之任而繫天下之重則有中丞胡
文忠公迨夫胡公旣沒東事方殷是時循江長驅收地
千里批亢抵巇進薄僞都鑒百萬之寇而無撓志竟以
滅賊而幹全局則有威毅伯中丞曾公又若運謀設奇
幽契鬼神驅駕豪彥盡其力能用能累殿方州迭馘凶
渠以藏曾公之緒則有肅毅伯揆相李公彼三公者皆

以不世出之姿而曾公致之大用始終相倚如左右手
功最高用才亦最廣若夫分當一面犄角兇儔戰攻並
庸水涵陸驤或籌略冠時或英鷲邁倫芟夷廓清之功
亦前代所罕覩則有若恪靖伯尙書左公尙書總督陝
甘楊公兵部侍郎彭公將軍多隆阿忠勇公一等子提
督鮑公至如忠誠奮發累建奇勛部曲精良異材輩出
不幸齎志以沒而灝氣偉節亦常與三光同明則有若
江忠烈公塔齊布忠武公羅忠節公李忠武公李勇毅
公王壯武公此數公者後先受曾公之知或超自帷幕
或拔自行陣或以講學之儒一旦敦起屬之軍旅或自

下僚推轂以進。未一二年而名位幾相並。用是戮力一心。更進迭起。以夷巨難。康海內。其他建立稍微。而皆已大顯於時。及才宜大顯而先沒者。又未易以一二數也。夫古今盛衰之運。以才爲升降久矣。今夫前聖良法。垂之數百年無弊。舉而行之者。不得其才。則亦爲病民之政。發謀決策。戡定亂略。任之非才。則往往致敗。是故事須才而立。才大者必任羣才以集事。則其所成有大者焉。才尤大者。又能得任才之才以集事。則其所成又大者焉。累而上之。能舉天下之才會於一。乃可以平天下。夫天下曷嘗一日無才哉。上莫之倡。則雖中材以上。

往往不能自奮比槁項鰐鰕而人莫之知幾且不能以自信或遂漸於習俗以自喪其才於是乎才傲而天下與之俱傲往者楚軍之克安慶也在

今天子嗣服之初八月之朔是日也五星聚張翼之間占者以爲楚地有賢才佐致治平之兆迄今數中興文武之佐其什七八皆楚才也夫豈天之生才於楚獨厚哉以有倡之者也語曰一人善射百夫決拾而况名世之興乎

練兵 己巳

練兵視將。練將視敵。駕駟馬。馳峻坂。控馭之無術。鮮不
寔者。雖有湛盧之劍。良工磨而淬之。然後百用而銑不
頓。治兵猶御之御輿也。工之礪劍也。募萬人之軍而樹
之將。供之財。模芻橐器仗。無不具。期年而用之。或窳以
敗。或整而弱。或以雄視天下。則將之才否固殊焉。故曰
練兵視將。夫殺敵者。兵也。導其兵使殺敵者。將也。今夫
敵有堅有脆。有鈍有銳。有椎有點。其用武之地。則有山
有陸。有江有海。有溪港。有阨塞。其技則有艦。有步。有騎。
有火攻。有矛矢。其事則有近勦。有遠禦。有野而鬪。有城

而守有隧而攻若此者術博事繁因時異施雖上智不能畢其巧爲將者非目擊而身嘗固不能洞其機牙而悉其情勢將不閱敵之情勢而使導其兵以殺敵之事譬猶閉戶索圖而指畫山川之形勢雖或得崖略然究其弊不疏則舛是故敵不勁者將不練何以知其然也昔者唐有安史之難而後郭李興焉宋有女眞之難而後韓岳興焉明有倭寇之難而後俞戚興焉近世洪揚構亂毒被寰區其始將才乏絕有扶而樹之者則江塔羅李楊彭多鮑接跡興焉夫此數賢者豈專恃驚異閎駿卓絕之才哉蓋其身歷艱危屢困益奮焦神極能

磨以歲月始各精其制敵之術耳其敵益彊其績益茂故曰練將視敵今天下營兵之不振其有由矣承平日久或沒齒不更戰事爲之將者亦且酣嬉卒歲拘文畏嫌趨便養尊蒐校不勤甚者浚財自豐營徇私圖於是乎有衰窳綴名之卒有傭僕詭寄之籍有侵減虛懸之饟其兵仰食縣官視爲當然骹滑苟媮飲博無藉愿者執業營生曠怠厥事臨操膺集紛應期會時則巧演虛藝以炫耳目一遇徵調膽寒氣沮行則需車役則需夫繁索供張官民交病泊乎臨敵名能折衝致果者什不二三觀也積習相沿厯久益敝其始也因不戰而無才

無才而兵以不競其末也。雖有賢才亦束於勢而牽於習。雖欲振勵之無由。譬之水。源清而流漸濁。流遠不可復徵也。譬之廣廈。楹棟橈腐而垣頽侈。非撤而新之不可復支也。故嘗試論之。近日天下有三耗。而養兵居其太半。三耗不去。則民不紓。國不富。何謂三耗。曰。河工也。漕運也。養兵也。數十年來。耗天下正賦幾盡。而巨寇隨之以起。今河漕之弊。幸以河徙而大減也。天也。往者粵寇之殪也。撫黨之殲也。不用一兵之力。而練勇之績。百倍綠營。然而可以救時。未能經久。於是練勇以漸而撤。而綠營之制。裁者蓋寡。世之議者。知營兵之不足倚也。

於是有倡練兵之謀者。其議以爲綠營勢難驟振。而畿輔根本重地。不可無備。宜就諸營選材武者。優其廩餼。旬試月校。練爲數軍。遠法古人選鋒之意。近仿明代十團營之制。宜若可以建威銷萌。靖內寇而禦外侮矣。然而五六年間。累作累輟。迄無成議。無他。病在拘守綠營之舊制也。綠營舊制。厥有數弊。曰令太繁。權太分。情太隔。且入練出征。一再相傭代。則所練非所用。所用非所練。練之特文具耳。糜饟耳。一旦有變。何備之足恃。然則今之練兵。宜如何。曰當無事而言練兵。靳其驟能克敵。不可必也。當極敝而言練兵。雖欲稍襲舊制。不可爲也。

爲今之計。惟有用練勇之制。行練兵之政。減舊兵之籍。益新練之兵。蓋綜其術。有五。杜四裕。三戒。而終之以四效。是故。慮其習於浮惰也。則招選欲慎。演閱欲勤。約束欲簡。以嚴此。以杜浮惰之弊。慮其病於牽掣也。則一軍之權。付統將。一營之權。付營將。俾責專而各事事。此以杜牽掣之弊。慮其工於冒襲也。則慎覈其饒。而嚴課其技。重立禁約。責成哨隊長。違者併黜。此以杜冒襲之弊。客兵遠戍。服食語言弗諳也。惟其民亦外視而相疾。兵因民之見疾。斯不免齟齬之以勢。而客主益相齟齬。今募北方土著之民。練以南方久征之將。夫募北人。則習其

風土而與民無迂用南將則厯更戰陣而教練有法雖其兵將不相習然昇以威柄加意拊循久必有效矣此以杜兵民不和之弊養兵萬人分之則勢隔而情渙聚則不可以久今宜以省垣爲軍府凡用人布令選閱之期咸於是集無事則分路設防不時調使巡哨以習其勞分期踐更以均其役斬令脈絡貫通可分可合則緩急足倚此以杜勢隔情渙之弊五弊旣杜則又有宜裕之者四練兵雖以萬人爲率然不必一朝募也得營將數人始定營數得統將數人始定軍數要以得人而止且使將之才有餘於兵之外勿使兵之數有餘於將之

外此任將而裕其力。方今州縣所舉有才之科。意必有廉明習事。忠樸耐勞者。似可量宜採擇。以備營哨官之用。異等者不次擢之。俾地無棄材。且以開北方之風氣。此求人而裕其材。綠營雖敝。勢難驟撤也。今就營兵略選精者以入練。入練者裁舊營之額。其未入練之兵。老死者空勿補。獲戾者黜勿補。營兵漸減。則移其饗以供練軍。此補苴而裕其饗。馳逐之長。莫如馬隊。遠攻之長。莫如火器。欲占時地之便利。則馬隊與火器不可不加意選練。以待不時之用。此制寇而裕其具。夫是之謂四裕。上之所不可不戒者三。戒部例之紛而撓軍政也。戒

用人之拘而多寬習也。戒經費之絀而乏恆款也。其練之而成也。則有四效。新軍既練。營兵可減。稍以此制推之他省。則蘇壤之習以漸而變。一效也。馬賊梟匪土寇之起。卽時調遣。鋤其穴根。二效也。洋人要求無已。實陰伺我疆弱。以爲進退。畿輔有練軍。則隱若長城。洋人不敢肆爲桀諤。三效也。昔之恆屈於洋人者。非以無備故邪。國誠無備。則凡事容忍。浸至翫法傷政。損威墮防。後雖悔無及矣。今以練兵鎮中外之人心。則當事者亦增氣自壯。而可以理折無厭之請。四效也。凡此五杜四裕三戒。審之勿失。乃收四效。而練兵之能事畢矣。若夫樹

功之博隘臨事之變化非可以豫言也其權在將將亦不能自主也其機在敵

曾文正公總督直隸時余隨襄幕事會有練軍之議因作此篇歲乙亥余上治平六策復申是說部議頗韙之下各行省酌辦近十年來各省加餉練兵者已居三之二然課其實效仍不如淮楚諸軍之得力卽篇中所謂雖有賢才亦束於勢而牽於習雖欲振勵之無由也而所籌加之公費亦或少儉焉當事者可以洞其微矣

自識

治河 癸酉

自古治河無善法。河之經流久而不能不變者勢也。自禹疏九河。河自碣石入海。迄王莽時逾二千歲。河之變遷不一次。而大勢以北流爲歸。自東漢王景導河。由于乘入海。歷唐至宋九百餘年。河之變遷不一次。而大勢以東流爲歸。自宋仁宗時橫壠商胡頻年大決。東流北流迭爲開閉。朝議紛紜。訖北宋之世。東北分流靡有定局。自金明昌之世。河始分入於淮。有明中葉。北流斷絕。而全河遂奪淮流。於是向之東北流者。改而南流矣。咸豐乙卯。河決銅瓦廂。全河去淮。由大清河入海。於是向

之南流者復改而東流綜計四千餘年之中河流之大變惟此數者爲最甚今值大變未久當事者不能不謀所以善其後於是有議復淮河故道者是欲挽之南流也有議就大清河築隄者是欲保其東流也更有恐其北入畿甸挾滹沱河爲患者是逆慮其北流也事體旣宏興舉不易且中外之論不合而南北之見復歧夫事之不易決也審矣蓋嘗攷之中國之水惟河最濁沙淤旣久下流必先壅滯河乃決其上流卑下之所故黃河無千年不變之道宋歐陽修謂河水已棄之高地決不可復其理然也今自淮河之雲梯關以東康熙之世諸

鉅公所迭議疏濬而未能如志者。況其後受病益深。河道且淤爲平陸。夷爲田廬。今誠挽河使南。而河之故道積沙久淤。且高於平地一二丈。必不能容受全河也。則其勢必將復決。決而北。則山東河南先被其災。是徒費財力而啓泛濫之禍也。決而南。則淮揚通海。先罹其禍。且駸駸乎有入江之勢。是混江淮河三瀆爲一也。豈非宇宙一大變哉。且不觀南河未徙之時乎。曩者以全盛之際。專力河工。耗竭天下財賦。奚啻三之一。猶且聖主宵旰於上。勞臣奔走於下。僅得一日以安。未幾而險工又見告矣。今幸全河北徙。經費裁減什八九。顧猶

必欲復之何邪噫是必聽汎官弁之素酣豢於斯者也。否則貧員游客之素仰給於斯者也。否則狃於習見而不能統觀全局者也。議者又曰。今故道之不能容河。固已。則請以北隄爲南隄。而復築隄于其北。可省隄工之半費。是又不然。蓋河隄之北。皆平地也。今欲行河於平地之上。是猶築垣而居水也。亦已危矣。然則謂河之南流有害。而河之奪濟遂無害乎。曰否。自河由張秋穿運而東。挾汶入海。而汶水不能濟運。則有阻運之患。大清河河身狹隘。全河貫注其中。遊盪靡定。頻年大溜衝齧隄埵。決溢田疇。山東之民。告昏墊矣。則有病民之患。河

之患先中於山東沿河州縣及直隸之開州長垣東明
而其他如曹州之多水套沮河侯家林石莊戶之累告
決溢沙河趙王河之淤爲平地皆河流遊盪所致失今
不治誠不知其何所底止矣夫議復淮河之害旣如彼
河奪濟流之害又如此兩害不能兼去也於是徇北人
之見者則欲驅河使南徇南人之見者則欲留河在北
是皆以鄰國爲壑也非公論也夫兩害相形取其輕者
今山東侯家林諸工猶不如向者豫工豐工之鉅也歲
修搶修之費猶不如向者南河廳汛之繁也若謂河流
遷徙靡常十年之後恐有大決則今將挽之南流而大

決立見與其糜數千萬之鉅費而自致決裂之大變不如因氣運之自然猶可以無悔也爲今之計必不得已則用大清河築隄之說乎夫自銅瓦廂至利津海口約千數百里自銅瓦廂至雲梯關亦千數百里其地相等也規復故河需銀二三千萬大清河築隄亦需銀二三千萬其費又相等也以相等之地與費而改其已然者其勢逆因其自然者其勢順順逆之分明者必能辨之矣是故慮大清河之狹不能容河也則寬其隄以蓄之慮山東之有棄地耗正賦也則以淮河涸出之地抵之慮山東之物力不能獨舉也則以數省協助之而況以

濟之清刷河之濁。前人已主其說者。而其地又與漢之東流故道爲近。儻治之有人。目前之患或可少弭。若必求萬全之策。使無一地一民之被其害。則自古所未見也。所謂治河無善法也。

自河淮交會七八百年。始有銅瓦廂之決。今自清江浦以下。直至雲梯關。淮水故道盡爲河沙所淤。遙望儼如陵阜。高於平地者數丈。而淮瀆之故道亦亡。淮水半自洪澤高寶等湖洩入運河。以達於江。半自運河洩入裏下河。分爲十數支。由鹽城興化一帶入海。今如挽河使南。其故道旣不能受。勢必挾淮水由運

河南入於江數百年後江之下流自金山焦山以下亦當淤爲平地江淮河濟四瀆盡亡而中國必有洪水之患雖神禹復生不能治矣所謂宇宙一大變也今之議者但見河之爲患於北頗欲徙河使南不知侯家林賈莊等處決口工程用帑不過數十萬兩較之向者豫工豐工之費其減省奚啻一二十倍而汎濫之害初非甚於曩時也且昔年南河東河歲修之費開支七八百萬兩盡以供大小人員之浮冒自銅瓦廂決口以後東河南河所支歲費約不過百萬兩左右孰得孰失明者自能辨之

乙亥七月識

創開中國鐵路議

戊寅

竊惟政莫先於利用功莫大於因時上古生民之初山無蹊隧澤無舟梁百里之內有隔閼不相通者聖人者出剡木爲舟剡木爲楫舟楫之利以濟不通服牛乘馬引重致遠以利天下迄於今日泰西諸國研精器數創爲火輪舟車環地球九萬里無阻不通蓋人心由拙而巧器用由樸而精風氣由分而合天地之大勢固如此也方舟車之未創也人各止其域安其俗至老死不相往來若居中古以後棄舟車而不用是猶謀食而屏耒耜禦寒而毀衣裳也必凍且餒矣今泰西諸國競富爭

強其興勃焉。所恃者火輪舟車耳。輪舟之制，中國既仿而用之，有明效矣。竊謂輪車之制不行，則中國終不能富且強也。攷輪車之創於西洋也，康熙年間，英國北境以馬車運煤，始作木軌以約車輪。迨道光十年，造成鐵路，始以火輪車載客載貨。其法愈研愈精，獲利不貲。煤鐵價減四之三，因得肆力製造，擴充諸務，遂以雄長歐洲。既而推行於俄、法、德、奧、美諸大國，卽如美邦新造，四十年前，尙無鐵路。今通計國中六通四達，爲路至二十萬里。凡墾新城，闢荒地，無不設鐵路以導其先。迨戶口多而貿易盛，又必增鐵路以善其後。開國僅百年，日

長炎炎幾與英俄相伯仲。蓋聞美之舊金山乘輪車至紐約爲程萬一千里。行期不過八日是萬里而如數百里之期也。旅費不過洋銀百餘枚。是萬里而如千餘里之費也。是故中國而仿行鐵路則遐者可邇。滯者可通。費者可省。散者可聚。請稍言其崖略。今天下大勢江淮以南多水路。江淮以北多陸路。南方諸省其地非盡饒沃。其民殷阜。此無他。以其支河別港縱橫貫注。而百貨得以流通也。北方諸省其地非盡磽瘠。其民貧苦。此無他。以其沙多水淤。道里修阻。而百貨不能流通也。邇者歲入財賦。洋稅千數百萬兩。釐金千數百萬兩。大約在

南方者什九。在北方者什一。誠能於西北諸省多造鐵路。俾如江南之河渠。經緯相錯。則貧者可變爲富。卽東南諸省。得鐵路以通水道。所不達。則富者可以益富。釐稅之旺。必且數倍曩時。此便於商務者一也。自有輪船以來。江浙漕糧。改行海運。而國與民兩便。然議者猶欲規復河運。以防海道之不測。與其擲重貲以復河運。不如招商股以開鐵路。鐵路旣成。譬如人之一身。血脈貫通。則百病盡去。且昔日西征之師。轉運費逾千萬。今年晉豫薦饑。山西米價騰踊。每石需銀至四十餘兩。設令有鐵路可運。由津至晉千餘里。核計西人運價。每石不

過三兩左右。合之天津米價。亦不過六兩以外耳。今以轉運無路。而價昂輒逾七倍。是饑民之死於溝壑者。亦至七倍之多也。豈不哀哉。設令輪車盛行。則漕運也。賑糧也。軍餉也。皆不勞而理。不費而捷矣。此便於轉運者又一也。曩者海氛不靖。動輒調兵遠省。經年累月。僅乃成行。籌糧籌費。拮据不遑。比其稍集。而彼又不知何往。所以未及交綏。情勢已爲之大絀。何則。彼萃而攻。兵雖少。而見有餘。我分而守。兵雖多。而形不足。彼有輪船。以資遄發。故一動而諸路受其警。我無輪車。以利徵調。故悉銳而一路尙難固也。昔普之攻法也。其初靜以待動。

示不用兵。逮聞法將伐普，始以電報召諸將，不十日而數十萬之師畢入法境，遂使法人不及措手。此鐵路之爲用大也。誠令及時興造，一旦有事，雖雲貴甘肅之兵半月可集。然則中國而有鐵路，卽令每省養兵一萬，合十八行省計之，無異處處有十八萬之兵也。中國而無鐵路，卽令每省養兵十萬，而汴港紛歧，防不勝防，仍猶疋者之不能起，跛者之不能行也。矧此制一行，中國雖裁防兵之太半，而聲勢聯絡，日見其強。他日卽以裁兵之費，增營鐵路，復收鐵路之利，以供國用，一舉而三善備焉。此便於調兵者又一也。且今中國興舉之事，不爲

不多然皆必得鐵路以濟其窮者何也。凡遠水之區。洋貨不易入。而土貨不易出。今輪船所不達之處。可以輪車達之。出入之貨愈多。則輪船之懋遷益廣。此與輪船相表裏者也。煤鐵諸礦。去水遠者。以輪車運送。斯成本輕而銷路暢。銷路暢而礦務益興。從此煤鐵大開經營。鐵路之費亦益省。此與礦務相表裏者也。輪車之馳。日千餘里。其行倍於驛站。最速之馬。從此文書加捷。而民間寄信章程。用西法經理。俾與鐵路公司相附麗。其利甚溥。並可稍裁驛站。協濟鐵路之費。此與郵政相表裏者也。方今閩滬諸廠。入款日絀。出款日增。無自然之利。

而專待撥公帑未有能持久者也。今宜令出洋學徒研究鐵路利病。數年之後。各廠竟可自造。推行既廣。則製者修者。日至而不窮。議定章程。按給工價之外。津貼廠費若干。較之購自外洋。既省運費。又免緩急不時之虞。各廠得此挹注。亦可經久不廢。此又與機器諸廠相表裏者也。夫開鐵路之便。如此其廣。否則不便如彼其多。是故西洋諸國。視建鐵路。與城郭宮室等。近以區區之日本。亦復銳意營造。然而中國獨瞠乎居後者。何也。則囿於見聞。而異議有以阻之也。議者皆曰。鐵路若開。恐引敵入室也。恐奪小民生計也。恐當路之衝。冢墓必遭。

遷徙禾稼必被薰灼也不知此皆揣摩影響而不審于事實者也昔普之攻法也陰遣死士先壞其國中鐵路法人行師濡滯終以是敗若果足爲敵用普人何不留爲入法之塗而必壞之乎然則鐵路者所以徵兵禦敵而不能爲敵用者也是故當總路扼要之處必駐營以守之每段十里五里設巡役以瞭之所以防護之者至周且密設有不測則壞其一段而全路皆廢祇一舉手之勞耳惡能爲敵用哉且鐵路公司旣設於是有修路之工有駕駛之人有巡瞭之丁有路旁短送之馬車有上下貨物伺候旅客之夫役計其月賦工精八口之家

足以自贍緣路則可增設旅店其饒于財者可以廣買
股分坐權子母是皆擴民生計者也乃謂爲奪民生計
謬矣若夫遷冢墓薰禾稼之說殆指洋人言之然惟中
國不爲故洋人惜良法之不行欲代中國倡行之中國
先自舉動則萬國公法固無干人自主之權者且中國
政務以順民心爲本其冢墓當道者稍迂迴以避之鐵
路寬者不過盈丈狹者數尺兩旁稍營餘地豈有薰灼
之患二者皆拘墟之臆說其無足慮甚明由是言之此
事不爲則永無創闢之機何也成見終難遽融也爲之
則必有振興之日何也習俗可以漸化也往歲吳淞口

之開路也。南方士大夫見慣不驚，漸有稱其便利者是風氣亦在倡之而已。夫濫觴之水，可爲江河；勾萌之達，可被山阿。西洋諸國五十年前，亦猶今日之中國。爲今之計，宜有以稍倡其端，以新中國人之耳目。則數十百年後，不患不如今日之西洋也。且西洋鐵路雖長，其始或數十里，或數百里，皆由積累以成通衢。今宜擇繁盛密邇之區，試辦一二，俾民觀聽日洽，鼓舞於不自知，夫擲數百萬之帑項，以開千古非常之功，此庸人所驚而聖人所必爲也。民俗旣變，然後招商承辦，官爲掌其政令，定其稅額，恤其隱情，而輔其不逮，可以漸推漸廣，漸

續漸遠自京師而西可爲路以達太原南可爲路以達汴梁東南可爲路以達清江浦由太原而西可接而達於西安於蘭州於蜀滇黔汴梁而南可接而達於漢口於長沙於桂林清江浦而南可接而達於蘇皖於江西於浙閩廣由是再極於四周錯綜交互無遠弗屆如是不聯遐僻於呼吸變貧弱爲富強者未之有也而要其發軔之端必自近地始然斯事至繁且賾其始行之有變通之法有杜漸之宜有推廣之功一不慎則弊端立見茲謹議其大指而略具條目如左

一平地開路百里合計買地填路及一切工程物料置

備火車機器之費約需銀四十萬兩近聞開平礦務議
開鐵路而居民慮其不便蓋以鐵路縣互不斷其兩旁
雖築路拱以留原有之直路然民車農車與夫牛驢耕
具勢不得越路而往來則橫路不可不開也當此造端
之始必以便民爲本他日擴充營建乃不至有所阻撓
將欲便民莫若用旱橋之一法俾鐵路出橋上而行人
車馬皆出橋下其布置之疏密宜相度形勢或十餘里
或數里而建一橋因其故道勿令隔絕則民無怨言雖
因此多費數萬金固勢所不能已也開平礦政既有功
效則磁州荆門大冶諸礦亦可仿行矣

一自大沽至天津水路紆曲逾二百里若由陸路開徑道不過百里似宜籌經費集商股修一鐵路與水道相輔並行俾民間見日多數年之後運載漸旺他處必有聞風而起者未始非爲山覆簣之一助也

一中國士大夫不知鐵路爲何物驟聞是說不免疑駭及目見之則此事本甚平常無足驚異從前吳淞口鐵路若留至今日則知其利者必漸多今旣先創造天津大沽一路則自吳淞至上海自臨清至張秋自清江浦至桃源之仲興集自周家口至汴梁自常山至玉山自袁州之蘆溪至萍鄉自江山越仙霞嶺至浦城自南安

越大庾嶺至南雄皆可漸次經營以便商旅以利轉運以裕稅課統計成本約皆在百萬兩內外無論或招商股或籌官款皆易集事商民既見慣不驚或可漸推漸廣以收日積月累之功

一外洋鐵路有雙單行之別雙行者可以一往一來單行者或今日往而明日來或半日往而半日來雙行之路占地寬不過一丈二尺單行之路占地七尺此路雖在官道之中既須填築加高與官道判若兩塗自於官道中車馬行人無擁擠磕碰之患其十字午貫之路除建旱橋一法外又有於兩旁設立柵門瞭望火車將至

則閉柵以止行人。俟火車既過，然後啓柵。其法不如旱橋之盡善，而用費亦可稍簡。至造路之費，地價亦其大宗。如有田廬侵礙官道者，當不惜重價以償貧民。萬一墳墓田廬不願遷徙，自當設法繞避，勿稍勉強，必使官吏盡知此意，則紳民自無阻撓矣。

一買地築路。議不得損民墳墓，侵民田廬，以順民心。然非常之原，黎民所懼。彼傍路之人，疑奪其生計，必出死力以相撓。近聞閩省創辦電線，恆被鄉民毀壞。然彼不過耗費工程而已。若鐵路受損，動關數十百人之性命，其勢尤危。今立法在何處開路，宜就地先招股分，不得

則以商股充之。其關路人工路旁巡役與夫搬卸貨物。伺應旅客。均先招用近地之人。不足則另募以補之。以爲拓民生計之明證。夫土著之人耳目易周。呼應易靈。且一人業此足化十人。十人足化百人。推而至於無窮。則不費財而民心可大附。此要結於無形之術也。

一洋人於中國鐵路望之甚殷。或慮內地貿易繁盛。彼又將請添口岸。不知西洋諸國本無內地開口岸之例。卽日本鐵路漸興。不聞洋人之有他求。若因此而輟要務。是猶慮人借貸而不自理其田產也。其究也。必將借貸於人而不可得。且今經營內地鐵路。洋貨得我之轉

輸而銷路益暢。我得洋貨之附益。而轉運益多。固屬一舉兩利。洋人有執照遊歷內地者。亦聽其附我輪車。總之守定約章。無瑕可蹈。彼斷不能爲意外之請也。

一鐵路創辦之始。似不能不購之外洋。又不能不僱用一二洋人。然宜亟令閩滬諸廠。招募華匠。刻意研求。有知此中竅要。及能駕駛火車者。給厚糈以鼓舞之。庶數年之後。可以自造自修。不至授柄於人。亦不至一旦有事。猝然停廢。公司股分。宜仿輪船招商局之例。不得轉賣洋人。非惟豫防流弊也。保中國自主之權。當如此也。

一火車大行之後。各州縣驛站。漸次酌裁。其費可供鐵

路之用。惟州縣辦公。頗有仰給驛站者。宜查明有驛州縣。向得餘費若干。由鐵路公司如數津貼。以爲辦公之用。如是則官與商浹洽。公事不至掣肘矣。

一外洋有鐵路新式。其窄不過一尺內外。地勢不必修平。下栽木樁爲架。上置浮梁。梁上鋪鐵爲轍。轍與輪相轄。兩旁復有平輪。夾木梁而行。以防傾側。用以運兵載糧。費省工速。其木架隨時可搭。不用可拆。如涉水之有浮橋。所以濟急一時也。近者普法之戰。俄土之戰。均用此路以運軍儲。蓋倉卒之秋。修治鐵路。非惟費多。亦且不暇。不若用窄路之爲便。他日有不虞之事。仿而行之。

亦事半功倍之道也

與法蘭西立約通商保護越南議 壬午

竊觀法使寶海所議中國與法國應辦越南事宜三條。大旨不外分界通商。與保護越南。果能互崇信義。秉公立約。則法人有悔禍之意。越南有可存之機。從此釁端漸弭。邊疆漸固。而中國之經理外務。漸能制勝於無形。卽異日朝鮮琉球諸藩國。亦當隱蒙其益。此中國盛衰強弱之機括所由分也。然嘗攷之以敵情。徵之以近事。復將寶使前後文函。反覆玩味。竊慮法人未必遽就範圍。尙將故作波折也。洋人之得步進步。卽欲行此三條。而節目尙多可議也。約事之多歧。人言之可畏。稍不詳

審或致貽悔於將來也。夫事不籌之於豫，則設慮不周。思不集之於眾，則獲益不廣。福成因斯事，關係全局，謹審其剛柔緩急進退迎距之機，宜議其大略如左。

一和戰二事宜虛實相濟也。邇年以來，外侮環逼，議者或偏於主戰，或偏於主和，不知二者皆非也。夫壹意欲戰，則將使彼不能轉圜，兵連禍結，致成不了之局。且中國武備未精，未可爲孤注之一擲也。壹意欲和，則彼窺見我之情實，益肆要求，無所底止。一國得志，而諸國效尤矣。中國將奚以自立邪？是故爲今之計，莫如以和爲體，以作可戰之勢爲用。昔者英人之救土耳其也，廣調

戰艦進泊黑海。仍隱勸土人與俄講解。故俄人有所顧忌。而其約易成。庚午天津之案。誤在未調重兵。不免於倉猝之間。爲法人所挾制。甲戌臺灣之役。雖有重兵。又誤在議和太速。近者東北邊調軍防俄。而伊犁改約。未受大損。朝鮮告變。雄師電邁。而倭人氣沮。受盟而退。此皆其明驗也。且所謂作可戰之勢者。即使事機所值。偶出於戰。亦必時時執願和之說。如是則敵不能歸曲於我。而轉圜亦易。夫法人之破東京也。瞰其無備。突啟波瀾。無理極矣。乃轉歸咎於河內總督之藐視。自稱並無侵佔土地之意。時以交還東京。補立和約爲言。戰國時

蘇代之論秦王曰。必令其言如循環。用兵如刺蜚。夫殘破人之國都。而猶厚貌甘言。自云並無惡意。可謂言如循環矣。恃強陵弱。不崇朝而取東京。可謂用兵如刺蜚矣。中國亦宜稍襲其意。惟知雖戰而無礙於和。則其究亦并不至乎戰。此和戰二事虛實相濟之妙訣也。

一法國上下之謀議。不可不審明也。法在歐洲。習於戰鬪。素稱強國。自改爲民政。而其國人始有息肩之意。且畏德人戰勝之威。割其腴壤。償以鉅費。法之君臣痛心疾首。未嘗不思蓄銳觀變。以全力求逞於德也。今矚越南之貧且弱。欲稍稍蠶食其地。如英之據印度。俄之滅

波蘭。然法之所畏莫如德。德與法同壤而國勢日強。不
啻卧虎伺榻。俄奧諸國又法之世仇。而德之與國也。英
人每以滇境通商。忌法人之占先著。法人豈不知之。法
之牽制既多。竊料彼國經營越南。僅用財力兵力十分
之一。計猶爲之。若必老師糜餉而多後患。則彼必長慮
卻顧。有所不爲矣。何則。彼非畏中國也。畏歐洲諸國之
議其後也。今法聞中國發兵之信。攘臂而起者。固非無
人。然究其歸宿。必係願和者多。願戰者少。觀其外部接
寶使電信。卽飭西貢巡撫勿得生事。其情可見。竊嘗以
管見度之。其言戰言和。紛紜無定者。法之上下議院也。

經畫邊務兼顧大局適可而止者法之朝廷也不憚啟
釁欲以拓土爲功者法之西貢巡撫也至其使臣寶海
奉厥朝廷之意原以排難解紛爲職然彼亦量中國之
情勢以爲進退苟騁其口舌先得便利未嘗不見可而
進冀著其爲使之功審此數端而越南之事乃可措手
矣卽與寶使議辦越事尤不可不善爲駕馭矣

一滇粵各軍不能驟撤也自法人侵擾越南中國分道
出師以示聲援未嘗明言拒法而越南君臣以壯其氣
不致驟立受虧之約劉永福等以堅其守不肯遽爲退
避之謀卽法人亦以兵少勢孤有所顧忌此誠綏邊字

小之要著也。迨兩國之軍日益相逼。恐肇釁端。姑因寶使之言。酌許退軍。以便兩國派員會議。乘風轉帆之妙。誠莫亟於此。乃寶使照會稱中國已飭官兵退紮。足令法國派出驅逐黃黑旗黨巡軍。無有阻難。是我退而彼反求進。情殊叵測。且與前言不符。誠有如總理衙門所慮者。即使寶使並無此心。或因譯漢文義稍有訛舛。然中國救越之得勁也。以出師。則其鬆勁也。必以退師。若竟如寶使照會所稱退回本境。法人見中國退兵之速也。彼之議院。必因此窺我之怯餒。而謀濟師。彼之西貢巡撫。必益以覷越之虛弱。而謀佔踞。勢必進攻劉永福。

等以規北圻諸省。不必寶使先有此情也。倘法人乘機思逞。卽寶使亦力不能禁也。彼時執前議以責寶使。彼將置之不理。若我兵因法人爽約。旣退復進。恐必激成釁端。轉非弭事之道。福成愚以爲此時粵軍分布富良江以北。與法軍尙隔一江。不必撤退。或令其最近東京之一路。酌量移營。滇軍前敵在興化以東者。宜密飭酌度形勢。退舍數十里。已足表和好之誼。若寶使以未退回本境藉口。宜答以兩國相交。未聞有施無報。中國旣退紮以示先施。法軍亦宜退出東京以昭睦誼。如此乃足問執其口。而折其無厭之求。卽至會議之時。兵備尤

不可稍懈。庶聲威振而和局可成矣。

一立約分界保護最宜詳審也。越南全境近三十省順化都城在富春省。富春以北以廣治省廣平道爲左圻。其河靜乂安甯平清化南定興安河內海陽北甯廣安諒山太原高平山西興化宣光十六省爲北圻。富春以南以廣南省廣義道爲右圻。而南圻九省中有嘉定邊和定祥永隆安江河僊六省已爲法人所踞。設西貢巡撫治之。惟廣和富安平順三省尙屬越南。是南圻所存不過三分之一。惟北圻境壤綿廣而十餘年來中國疊次出師爲越南勦平劇寇。如吳亞終黃崇英李揚才陸

之平等。悉就擒滅。富良江以北之山西太原諒山高平。北甯宣光海陽等省。皆中國所戡定之地。且其土產較瘠。非法人所垂涎。其素稱膏腴。爲彼所注意者。蓋在越南。都左右圻。及南圻所餘之地。又以經營富良江商路。則北圻迤南之地。亦難盡讓歸我。此法人之隱情也。竇使照會稱。法國願設法自海口以達滇境。通一河路。以裨商務。又稱兩國在紅江中間之地。劃定界限。北歸中國。巡查保護。南歸法國。巡查保護。併互相立約。將越南之北圻。現有全境。永遠保全。夫僅曰保全北圻。則北圻以外。如順化都城。卽非所保矣。萬一此約既定。彼卽進取。

越都我將不能過問。且紅江卽富良江也。富良江以北之地不及北圻之半。是中國所巡護。僅有越地五分之一。未昭平允。况彼旣認保勝爲中國所開之口岸。保勝在富良江以南。則其中又多軫輻。似宜如總理衙門所議。北圻歸中國保護。南圻歸法國保護。以與之磋磨。雖明知彼必不允。然進求乎上。僅得其次。將來或能辦到。富良江以北北圻之地。歸中國巡查保護。越南現有南圻全境。歸法國巡查保護。富良江以南北圻之地。與其都城左右圻之地。仍令越南自爲經理。由兩國遣使常駐越都。設法保護。其富良江上下游。俾越南認爲法人

通商之路如中國長江通商之例至其設官分治設關收稅均由越南自主如此則措注允協可無南顧之憂矣。

一法人如不認越南爲中國屬邦我亦宜勿認法越之舊約也法越兩國甲戌年所立和約聲明越南操自主之權並不服屬他國是法人早伏狡謀欲使中國不得與聞其事而越人自墮其術中矣又稱越南之平定海陽兩省溯上洱河可達滇境是其蓄意開通商路已非一日然越南之朝貢中國乃中外所共知彼既不認爲我之屬邦我亦宜勿認其前約况雲南爲中國之地則

通商允不允之權在我。苟能握其要領，善爲操縱，彼自須就我範圍也。

一法人宜以東京交還越南，以符原議也。法人之初下東京也，曾行文越南，謂河內總督不以禮相待，致有攻戰。然實非利其土也。請越南王派員赴河內妥議，以便交還城池。又稱欲補立條約，卽許退出東京，並將所取庫銀及海防關稅銀三十七箱交還越南，仍許越官依舊收稅。寶使亦迭次切實言明，彼國並無佔併東京北圻土地之意。是法人之踞河內，初意本在要盟。今保勝通商，旣如所請，則交還城池與帑項，亦必議定日期。東

京旣須交還則彼設局巡查北圻之說似宜駁罷何則旣稱巡查則必駐兵駐兵則越南不能自立富良江以南之地恐終難保全也

一滇境通商爲英人所忌宜令法人知之也英人於煙臺條約早有通商雲南之議祇以緬甸陸路多阻迄今無成乃法人捷足先登開通江路則緬甸通滇之路更難英人有慮其事者見於本年七月新聞紙謂嗣後法與緬鄰倘英緬失歡則法人必濟緬以軍火緬與法將立保護之約將來法必全滅越南而以緬爲外府大非英人之利等語是英人慮之熟而忌之深矣春間越南

侍郎陳叔訥託招商局代稟有欲以重賂求救英德諸國之說厥後越南王咨兩廣總督求給憑照往聘英德諸國不可謂謀之不臧中國固宜玉成其事隱示扶持雖英德未必遽能助越究竟有益無損且易動法人顧慮之心此亦辯論時隱譬法人之一助也

一處置劉永福須妥爲斟酌也永福本黑旗黨之渠魁始爲流寇繼受越南提督之職扼守山西保勝一路權商稅以供軍餉故法人必欲驅之以通保勝商路然永福素恃此爲餉源誓死不肯退讓又前嘗敗法師北圻之民與黃黑旗黨之嘯聚者頗恃之以爲固法之兵輪

累次駛向山西不戰而退似稍憚永福威名者寶使初次照會謂中國應設法使商貨暢行如驅除盜賊撤去保勝境上關卡之類其後照會總理衙門則稱中國兵退紮足令法軍驅除黃黑旗黨無有阻難此皆指劉永福而言然使中國竟代法人驅剿永福非惟清議所不與且爲中外所竊笑固萬無此理若竟聽法人進攻永福則彼兵威旣盛或因此盡併北圻中國將何以禦之今欲籌善處之方保勝旣作爲中國許法人通商之口岸而永福嘗詣粵軍求救願爲前鋒似莫如由中國授以一官編其部衆爲一二營於富良江北擇地安插其

軍餉許由中國給發。日後卽在保勝關稅開支。諒永福不敢不遵。法人旣得通商之利。又聞永福爲我用。斯足稍戢其狡謀矣。

一通商章程。宜詳議慎覈也。法人知中國地產之厚。考求商路。殆閱十年。其著議謂開通紅江商路。則川黔西藏之貨。可由水道直達東京。各商咸願捆載而來。數年後進出口貨物。當增至數萬萬佛郎。故其經營不遺餘力。彼旣蓄意日久。我自難於阻遏。且就大討論之。亦可不必終阻。何也。使法人謀開此路。而中國初未覺察。則法人獨享其利。而中國將受其害。今由兩國會議通商。

原期兩國共分其利。果能使滇蜀土貨暢銷。邊民日臻富庶。則中國之獲益尤厚。倘將來保勝一關。每歲進出口貨價各有一千萬兩。是歲得洋稅百餘萬也。惟此爲邊地通商之始。與江海各口情形不同。從前各口通商所議條約。大半由逼迫而成。中國受虧過鉅。此次兩國本無交涉。中國因越事慨允商務。似不能援照江海各口章程。必當明示限制。仿今歲朝鮮與美國立約之意。議一最公允之規條。以昭友誼。或酌增稅項。或漸收政權。如此則他口續立之約。可援例議辦。已立之約。可隱爲挽回。其有裨於全局。豈淺鮮哉。

一越南既歸兩國保護則兩國所辦之事均應一律也。分界通商之議既定法廷必仍遣使駐越與聞國政名爲保護彼時中國若意存省事憚於遣使則越南之事中國仍不得與聞將獨任法使以把持啟其挾制侵佔之漸是以越南委之於法也。西洋於半主之國無不遣使駐紮况約章既定無復重要事件他日兩使駐越原不過遇事會議照約辦理而已。然既欲保全越南則循例之舉實不可闕或謂朝鮮越南同爲屬邦朝鮮既不遣使越南豈能獨異不知朝鮮之不遣使因其爲我屬邦而與西洋諸國平行也。慮體制之難壹也越南之不

能不遣使因兩國既有保護之名則兩使必有會商之務也恐措施之不壹也隨機應付各有所宜難一概而論耳

一富良江以北各省宜駐兵巡防也中國所以力護越南者欲固我滇粵邊圉也而富良江以北各省又滇粵切近之藩籬也越南不靖則北圻不安北圻不安則滇粵亦不安今欲保全越南如能跨富良江南北而守之固屬甚善卽勢有不能則江北各省宜駐防軍也必矣蓋法人既有巡查越南之說則其軍必不能盡撤而我一旦撤師示以未遑遠略又將啟彼狡謀且邇來粵軍

頻歲出關驅勦叛寇卽遇班師入塞亦常分布要害以顧邊防其餉項仍不能稍減古人所謂事不可息則住與行勞費相等也今令滇粵各軍分駐越境計不過於額餉之外多加運費而緣邊有拱衛之師屬國壯輔翼之勢防軍以巡練而少懈弛強敵覘舉動而憚聲威其爲利也多矣且法人以江北數省乃中國所戡定故其意甘讓而不爭萬一越南日就衰弱終至爲法所滅則中國分此一隅亦差免爲各國所輕視此乃將來最後之一著而今則未可明言也惟各軍暴露已久宜以休軍爲名入屯各省城中越人方恃我爲捍蔽必無異辭

斯邊陲收坐鎮之功將士免久役之苦矣

以上各端或理論於事前或籌措於事後雖法人未必遽能盡允然福成以爲頗有把握者以法人所深願者在通商所不願者在開釁也今脅之以所不願餌之以所深願堅持前說不稍遷就則管見所擬似有八九可成夫寶使原議三條大旨固在撮合兩國之好然窺其意實尙無定衡我苟力與相持則所得或稍溢於三條之外我不力與相持則所得或尙歉於三條之內寶使之所設辭推諉者不曰本國議院不允卽曰西貢巡撫不允今中國亦宜如其法以相抵制其有關於兵事者

可託滇粵兩督以拒之。其有關於界務者。可託越南及
劉永福等以拒之。其餘一切不可允之事。更可託中外
清議以拒之。拒之有辭。而彼乃知所允之非易得矣。夫
得失既巨。周折必多。果能貫以全神。始終不懈。俾斯事
持平。議結。則東西洋各國。知中國漸習外務。不敢肆其
侵侮。從此力加整頓。益圖富強。中外交涉之事。庶有豸
乎。

援越南議上 癸未

今越南之事急矣。法蘭西之燄張矣。越亡則法必進。齟齬侵我。厥利索我。商埠不興。則以兵威相劫。與之則得步進步。靡所底止。雖智者將何以禦之。且法一二邪黨蔑視中國。顯違輿論。謀併越南。迨知中國不能不爭。乃遣公使。脫理古。逞其狡悍。欲以危言脅我。既不爲動。復以巧言餌我。必欲使我不與聞越事而後已。萬一墮其術中。閉關守境。棄越不援。則彼益知中國可侮。他日必轉誣中國以隱助越人。來致詰問。然後借端進規。滇境之利。否則責令我兵助剿。劉永福以明其並不助越。

是何如昌言越爲中國屬邦不能強中國以不問堅辭
博辯與之相持使彼終無辭以難我法廷知中國不爲
所撓則邪黨之言不售而其氣已奪彼上下議院必仍
申前論排去邪黨休兵省費而與中國講解是越南尙
可恃中國以存也且今日中國之援越非徑與法失和
之謂也今之局勢與古稍異自泰西各邦分峙以來凡
兩國相爭卽有決裂之心決裂之備無明告人以決裂
之說者必故和其辭斂其形以懈敵怒而蓄厚勢將來
若請鄰國評斷旣非釁自我開必謂我直彼曲卽如法
人之侵越也突破東京復翦南定其用兵之焱銳可謂

不留餘地。然其爲辭。不過曰。欲令越南遵行舊約。欲輔越王整理國政。欲開通滇越商路。俾各國與中國皆獲其益。其言固甚甘也。法之於越。尙且如此。而況中國之於法乎。中國雖不委越於法。然中外文告。不必有與法失和之辭。則彼國紳民。益不願啟釁以妨商務。以負不韙之名。以蹈舍近圖遠之失。而中國乃得徐爲布置。拯越南之急。而無後患。何則。中國之援越。非好勤遠略也。非博字小之虛名也。非謂越南服事中國。永無侵叛也。中國之謀。在自固滇粵邊圉耳。在杜法人無厭之求。而與議定一範圍耳。在使東西洋各國。不輕中國。庶朝鮮

諸邦得稍自立。琉球諸案得以復理耳。爲今之計宜徧告友邦兼告法國以越屬中國數千百年揆諸公法斷難置之不理。廣選良將能臣謀士徧布滇粵三省俾滇粵增募勁旅分戍北圻而仍變其名曰防邊曰彈壓土寇曰助越南經理北圻夫其辭順則彼無所藉口也由滇粵募師則勢不張皇也用緣邊之人爲士卒則瘴癘非所畏也宜布告中外官民謂法與中國和好有年雖近因越事稍有嫌疑然中國斷無與法失和之心法之商民在各口者允宜加意保護格外優待以昭睦誼夫優待保護本在條約是不過款以虛言也法議院之主

議者惟商民而大事之定計在議院是厚結其商民之心卽隱掣其政府之肘也宜介英俄請越於法昭英俄德諸國以紅江通商之利先導越南與諸國立約密濟劉永福以餉械俾得盡力抗法夫英俄勸法法雖不允然英俄怒法之頑所以益我之援也先許諸國紅江通商則法無所挾以歆動各國所以孤法之黨也扶助劉永福使捍越邊所以樹法之敵也數策並施相機利導倘能酌中定議或仍如寶海分界之說而稍加變通或以越南爲兩屬之國由中法立約保護要使彼此形勢相均權利無失從此滇粵邊圉可固而法人可窒其無

厭之求朝鮮諸國可以自立琉球諸案可以復理大局轉移在此一舉竊願

廟堂之上堅持定謀始終不搖通中外之隔闕衷羣說於一是剛柔互濟策力兼用提倡風氣賢才益興定傾濟變決於須臾矣

援越南議中

癸未

或問兩國有事先論強弱以法戰艦之衆士卒之練火
器之精迥非中國所能敵且法人謀取越南處心積慮
已十餘年今中國以兵援越無乃挑強敵之釁乎謹應
之曰自古勝負之機曰理曰情曰勢越爲中國屬邦朝
貢之例載在會典中國累次出師保護越南勦平黃崇
英李揚才陸之平等地球諸國皆知之去冬寶海奉其
國命備文申明法國無侵佔北圻土地之意亦無貶削
越王治權之謀迨外部易人忽爾中變是揆之常理而
法當自惡也法之紳商廣布新聞紙謂外部不宜倡議

襲取東京各官聯名具稟謂民情不願開釁其外部至稱病不出其議院不肯多籌兵餉謂北圻可攻則攻否則決計調停各處電信及各口新聞紙皆言之鑿鑿是核以輿情而法已自餒也法國地居四戰船礮兵額雖多分防英奧俄德諸國其能遠調者不過十之一二然涉重洋四五萬里運兵之費一可當十況越境重山疊嶂如離紅江稍遠彼卽不能逞志是衡以大勢而法將自絀也夫理情勢三者不順法人早自知之故並無與中國失和之意近聞中國勢將決裂乃調兵船東來以備不虞但無事時鐵艦遊歷亦所常有卽法使脫理古

素善恫喝近亦不復挾動兵之說若我因兵船稍形疑懼彼轉將肆其恫喝矣今當漠焉與之相忘固可保無事也然中國猶懼其有失也是故因法之兵船廣集越南口外將擊阻我軍與運軍火赴越者則令滇粵由陸路濟師以避之因法軍堅守東京南定未可助越進攻以授彼口實也則令我軍遙作聲威深溝高壘以待之猶懼法人欲罷不能也是故與之辯論以開其悟示之形勢以伐其謀請各國之公評以止其私執通商之利柄以啗其志法人或恥敗軍殞將則越人早致書西貢巡撫卑禮遜辭以謝之猶不能已或令越人稍出李維

業卹款以餌之。法人或戀東京南定。則彼早行文越南。謂並非利其土地。卽當交還城池。宜令越人執原議以索之。又不可得。或姑許紅江開礦以易之。若旣如是。委曲求全。而法人猶來尋釁。是在我固可以無悔。何也。以我無啟釁之道也。以法人恃強不戢。我卽盡捐越南以畀之。猶將啟釁於我也。以彼得越南其勢益張。不如及今圖之。猶得理情勢三者之順也。爲今之計。宜速籌大宗的餉二百餘萬兩。如各省關撥解不能足數。可稍發戶部四成洋稅存款。與出使經費以附益之。分撥廣東廣西雲南三省。並稍備接濟劉永福餉械之用。俾廣東

速整水師調集兵輪布紮廉瓊海口操巡粵越洋面廣
西并舊軍募足萬五六千人據守太原高平諒山宣光
北甯等省均宜入駐省城而北甯之軍尤須厚集其勢
雲南并舊軍募足萬人扼守保勝之大灘仍分兵赴山
西興化擇險紮營與黃佐炎劉永福兩軍相犄角務使
越人氣壯力完不遽折而入於法則法人勢難持久當
無不就我範圍者前者粵軍自北甯退紮安勇安勇乃
北甯屬縣距北甯三十餘里其意蓋恐法兵來攻如拒
戰則衅端卽啟退讓則失地損威故稍居僻邑以便進
止不知北甯爲紅江以北數省障蔽糧貨所萃粵軍在

關外者。購糧皆在北甯。北甯失則糧路斷。我軍祇可全退入關矣。如法人窺我怯弱。但遣銳師數百襲取北甯。則我現駐安勇之師亦斷不能不退。且將舉關外數省棄之。何如先據北甯。示以堅守之形。法人與劉永福等戰事方殷。若我不與挑戰。斷不肯來攻我軍。致益一敵。今宜於北甯城外掘斷來路。多埋地雷。營牆內外多挖地道。以避大礮之轟擊。法人雖來不足爲患。且法聞我守具既嚴。斷不驟窺北甯。北甯固則諒山太原高平數省皆固矣。至於山西興化。逼近江邊。兵輪可直抵城下。法人素畏黑旗兵。累次不戰而退。如以兩城委之劉永

福當可堅守。無如永福兵數不多。近聞滇軍出關者僅七百餘人。勢孤力弱。宜令大隊陸續速進。專固劉永福後路。俾永福得悉其精銳。馳赴前敵。如此則紅江上游法難深入。既足扼商路咽喉。滇粵兩軍分布江北。已得越地三分之一。但能穩守堅拒。則越南雖削弱。足以圖存。法難遽得志於越。不能不轉商於我。卽法欲鑿志於通商。亦不能不求成於我。操縱進退之權。惟中國主之。此其措注得失。在幾微間耳。然則經營北圻。烏可一日緩哉。

援越南議下 癸未

輔積弱之邦糾散旅撼堅城抗方張之敵而不慄偉哉
劉永福蓋豪傑之士也竊觀永福驅其徒眾進薄東京
南定累挫法師殪其渠帥馳檄遠邇忠義鬱發其志可
嘉其才足用中國誠宜及時調護俾不至於蹉跌庶永
福常能助越禦法揶持危局而中國亦得用吾全力以
制其後然則中國所亟宜措注者其術安在哉一曰密
助餉械也蓋聞永福舊部約有三三千人今河內之戰
其眾至一萬數千則大半越兵與團眾之烏合者而永
福餉源僅恃保勝設卡抽釐兵事方起商旅裹足餉必

不繼。設令數月之後。糧盡衆散。而法之新兵方到。乘間進攻。則永福危矣。宜亟令滇粵諸帥。稍分餉項。運濟永福。時其關乏。而資給之。至西式槍礮藥彈。永福僻在邊嶠。艱於購致。然器不利。則不能命中。致遠而勇者必怯。强者必弱。亦宜令滇粵各軍。寬爲籌備。稍選精品。分給永福。俾得掩所短。以奮所長。則法人亦不能獨特其長矣。一曰密授機宜也。法師操練素精。器械犀利。今旣因敗增兵。必將力戰洩忿。其兵輪復扼踞紅江。互相援應。若與戰於平地。永福殆非其敵。爲永福計者。當固守上游。以避其鋒。彼地山徑叢雜。林莽阻深。加以天時溽暑。

水潦方降。法人必不敢冒險深入。而永福則不時出沒。伺間狙擊。或設伏以誘之。或乘夜以劫之。或亟肄以疲之。俾法人備多力分。百端惶惑。終當大爲所困。又聞永福所得法俘。殺戮陵虐。甚爲法人所恨。夫戰爭當務實事。虐待俘囚。於事無益。而徒激敵怒。使致死以求勝。甚無謂也。殺敵致果。與優待敵俘。相濟爲用。如能禮而卹之。既可爲異日議和之地。而敵怒稍懈。則我戰必克。亦兵家之要著。宜令滇粵邊將。召劉永福至營。密爲開導。永福勇略有餘。苦於不諳近來外洋情勢。旣告之。當必豁然無所疑也。此二說者。皆宜速而不宜遲。宜隱而不

宜顯若法人以暗助永福來相詰問則我固未嘗許法以必不助永福而助之又無實事可證法人固無如我何也或謂法人既爲永福所創他日如議罷兵彼必欲得永福而甘心或盡驅黃黑旗黨不居紅江左右而始快將如之何應之曰西人之律凡欲殺人而爲人所殺者則被殺者勿恤而殺人者勿問以其情急於自救也永福救越南之急則於越爲忠臣法人欲滅永福而永福自救其急則於永福爲無罪且法無端破越東京殺其總督等官若皆追問前事法將何以處之法人如不欲和則己法人苟欲議和則稍習公法而識時宜者當

不復以爲言也。至紅江通商之後，處置永福本爲最難。然亦當視法之勝負，與永福強弱以爲權衡。若法人未能遽克永福，永福亦不願離故地，而中國復欲借紅江通商以紓越難，似可仿去冬寶海之議而稍變之。由中國在保勝設關征收洋稅，編永福之衆爲數營，其餉項由關稅支發。夫永福爲護越而興兵，若法兵可退，越禍可解，永福亦復何求。儻通商以後，永福能戢其部衆，與洋人耦俱無猜，固不妨仍駐故地。萬一未能相安，亦不妨調守太原、北甯、高平諸省，俾稍離江岸，以弭釁端。要之永福常在北圻，衆情翕附，未始不可藉以隱警洋人。

也。然則中國之於永福，始終當以全力護之而已。

張振軒宮保云：三議處方於變症之後，表裏虛實，洞中支蘭扶危定傾，別無勝算。所難者中外一心堅持，定見耳。

上李伯相論西人傳教書 己巳

宮太保年伯中堂鈞座。春間接讀賜函。過蒙眷注。獎誨勤拳。頃聞黔蜀教民之案。洋人以未得所欲。嘖有煩言。復駛兵船溯江西上。冀遂其虛聲恫喝之謀。逖聽傳聞。敢陳瞽說。曩者洋人不靖。因我粵寇之難。抵巇搗虛。震驚京師。當是時。洋人以全力爭傳教。傳教不行。則約不成。約不成。則兵不退。與時變通。以釋近患。非得已也。勢也。和議既成。驟難無故而變約。且邇年內寇未盡除。海防未盡修。故含詆捐忿。彌縫瑕釁。非得已也。亦勢也。勢之所在。明者知不可違。則姑從容靜鎮。以徐爲之圖。而

不必斥言其害。然而十數年來。布於海內。其法於各州郡。先立教堂。招誘愚民。濟之財而餌之以藥。其人輒變天性。背人倫。惟傳教之師是從。其始也。一二至愚極貧之民。歆其微利而趨之耳。旣而羣不逞之徒。倚爲藏身之窟。肆其姦頑。有司不敢致詰。其賢者勉而致詰。動須關白教主。教主惟其徒是庇。而又何理之得伸。民知未入教者。受教民之虐而無所訴。一入教。則恣睢而莫之能治。於是相隨入教而不辭。甚者剖家財之太半。輸之教主。無難色。是其始誘民趨之。繼且迫平民而附之矣。其始民赴洋人之利。繼且傾所有而納洋人矣。浸淫蔓

延日久益熾其閒疆直守正不惑之民恃氣積憤強與之抗而虛僞樂禍者亦或藉以生事於是教堂之設閉境堅拒者有之率衆攻毀者有之仇殺教民兼及教士者有之一夫攘臂羣口譴呶官不能禁斯時欲右民而抑教則洋人持約而責其後恐因此召兵而誤大局且啟內民玩法之漸其或扶教而懲民則民誰不氣沮心懾以從洋人之教是毆吾民以歸敵也中外牽率進退交蹙則不得不調停客主之間爲之治其獄償其室委曲經營煩辯費財僅乃無事事未畢而各省攻教之獄復紛然起矣中國之釁何時而弭雖然多事猶中國之

幸也。何也以民之未盡變於夷也。竊恐數十年後。耳目濡染。漸不之怪。則附之者日益多。彼洋人斂中國之財。啗中國之民。卽率中國之民。啟中國之變。膠固盤結。踞我堂奧。瞞瑕伺會。倏迅雲合以起。而洋人糾羣國以制其弊。雖有聖人。不能爲之謀矣。英法諸國之遠闢疆圉。蠶食西土。大率用此術耳。議者或曰。吾自修吾政教。而正吾民心。則彼教當不振以去。此誠探本之論矣。然譬諸治疾。或治其本。或治其標。標不治。有旋傷其本者矣。昔者堯舜之世。民心無不正。而風俗至純美也。然使有執左道。挾幻術。以蠱其民者。則堯舜必執而戮之。夫堯

舜不恃其風俗之純美。而謂民之無可蠱也。苟有一人之蠱於教。則堯舜不能保天下民之不受其蠱。而足以傷純美之教化。夫是故不得不以刑法佐教化之窮。今天下人心遠不逮堯舜之世。而異教之蠱吾民。與入教之民之撓吾政者。非特於法不能禁。又當從而保護之。勢將盡化天下爲姦民。而良民無以自立。本之不治。孰甚於此邪。然則爲今之計宜如何。曰。尼洋人之傳教。則變速而禍小。徇之畏之。則變遲而禍大。與其坐而待莫大之變。何如先事而制其小變。且洋人之心。雖我徇之畏之。固未嘗不思變也。抑又聞之。日本朝鮮諸國。嘗禁

傳教而憇洋人矣。洋人悉銳壓其境而不能螫也。豈中國之人才兵力不如諸小國哉。然所以許其傳教者。則以向之屢困於洋人也。夫向之屢困於洋人。非中國人才兵力之不逮。其弊由於不審敵情。而和戰無定議。承平久而人不知兵。厥後賢才勃興。兵威至盛。雖堅拒洋人之傳教。不難。然悉力以角內寇。而未暇與洋人校也。故彼得縱橫肆侮。以至今日。今內寇將略平矣。誠令豫講戰守。廣儲人才。察諸國之可與者。厚約結之。以攜其交。而披其黨。一旦有事。則閉關絕市。扼其牟利之源。然後確持定謀。據險逆擊。未覩洋人之必得志也。夫苟操

是數者則洋人雖欲爲變固不足爲中國病且適以自速其病夫苟操是數者則洋人一有桀諄暴其罪狀而擊之可也否則重與之議約許其通商而罷其傳教可也否則嚴立條約俾吾有司得致法于教民可也不然則坐受其困矣伏惟中堂規置六合弛張不測淵深閎廓之謨想已早定於胸中非鄙儒所敢擬議客冬金陵侍坐竊聞談及洋人事英氣偉辯感發愚衷至今耿耿故因覩洋人之縱恣而敢縱論及之惟希亮察不宣福成謹上

季懷弟云洋人傳教是中國一大變局將來爲害何

所底止其不可不及早禁阻已無疑義文止將傳教之禍與當禁之故暢切言之雖未能速見施行後必有用其言者至其意識層出泉涌濤驅格高氣邁當在昌黎眉山之間

李眉生云此集中最精詣之文

此余十六年前所作蓋專論理不論勢者理勝則言之短長高下皆宜而文自不可磨滅故錄存之

自識

上李伯相論赫德不宜總司海防書 己卯

宮太傅中堂鈞座。頃見總理衙門來書。將以赫德總司
南北洋海防。添購快船。蚊船。分駐大連灣。南關兩處。由
南北洋各派監司大員。與赫德所選洋將。會同督操。詳
繹總理衙門之意。豈不以中國創辦水師。久無成效。而
倭人發難。擅廢琉球。外侮日迫。亟圖借才異國。迅速集
事。殆有不得已之苦衷。然福成竊見其患。未見其益也。
夫赫德之爲人。陰鷙而專利。怙勢而自尊。雖食厚祿。受
高職。其意仍內西人而外中國。彼既總司江海各關稅
務。利柄在其掌握。已有尾大不掉之勢。若復授爲總海

防司則中國兵權餉權皆入赫德一人之手且以南北洋大臣之尊尙且畫分界域而赫德獨綜其全南北洋所派監司大員僅獲列銜會辦而赫德獨筦其政彼將朝建一議暮陳一策以眩總理衙門既藉總理衙門之權牽制南北洋復藉南北洋海防之權牽制總理衙門南北洋不能難也總理衙門不敢違也數年之後恐赫德不復如今日之可馭矣或謂赫德以治兵爲榮非以攬權爲事卽以權論亦不過十餘號礮船耳夫奚足爲重輕噫何言之易也中國創辦海防以全力經營者原祇此十餘號礮船乃舉以畀之赫德彼得是爲嚆矢漸

拓規模中外魁柄潛移於不覺此履霜堅冰之漸不可不慎也。或又謂借才異國古有明效。何獨於赫德而慮之。不知赫德長於理財。本不以知兵名。中國初振武備。所倚惟一赫德。恐爲東西洋各國所竊笑。如欲延攬洋將以供任使。宜致書出使大臣。訪求專門名家。而又能受南北洋調遣者。酌量訂募。庶免太阿倒持之患。其獲效亦必勝用赫德遠甚。福成昨讀中堂復總理衙門一書。未嘗無長慮卻顧之意。特以既有成議。不欲顯與立異耳。竊謂中堂自任以天下之重。天下安危所繫。不得不剴切言之。總理衙門亦斷無不從之理。與其使赫德

掣肘於異日而釀無窮之患不如使赫德觖望於一時而葆固有之權此中得失不待智者而決也又繹中堂核定赫德所擬章程凡海防司所領糧餉軍火應先移文監司大員由監司大員轉稟南北洋大臣給發似稍足限制其權矣然其定章又謂用人支餉造械諸事惟赫德一人主之雖南北洋不得侵越則所云核轉一節實無予奪增減之權不過奉行赫德文書而已事權倒置孰甚於此若謂總理衙門已與定議不能中止宜告赫德以兵事非可遙制須令親赴海濱專司練兵其總稅務司一職則別舉人代之赫德貪戀利權必不肯舍

此而就彼也。則其議不罷而罷矣。且蚊船徒能株守一口。快船僅備兩號。聲勢亦孤。赫德所謂海防。本不過敷衍之局。今欲聲威雄壯。戰守咸宜。非購鐵甲船。不可。從前南北洋謀創水師。所以久無成功者。良由中外視爲緩圖。餉不裕而權不壹也。今若以畀赫德之權。畀南北洋。供赫德之餉。供南北洋。添製船械。廣羅將材。精心訓練。提倡風氣。將何功之不可成。是在中堂力任之。與總理衙門密商之而已。福成因斯事利害較鉅。輒敢據其千慮一得之愚。惟恕其狂瞽而財擇焉。大局幸甚。六月二十三日。福成謹上。

伯相既得是書。躊躇旬日。始撮舉書中要語。函達總理衙門。總理衙門以專司練兵。開去總稅務司一缺之說。告赫德。赫德果不願行。遂罷此議。己卯八月識

上張尙書論援護朝鮮機宜書

壬午

昨讀大疏。圓暢修潔。布置井井。而見幾之明決。籌辦之迅速。亦爲中外意料所不及。私衷企佩。匪可言喻。退而就事理之曲折。反覆思之。此舉以順討逆。以強制弱。必可迅速成功。所慮者。日本兵船先到耳。日本外務卿井上馨。素饒謀略。秩望較崇。有便宜行事之權。今年朝鮮與西洋各國立約。中國不使與聞。彼已深懷忌恨。萬一此次乘朝鮮內亂。逞其狡謀。以與中國爲難。甚屬可虞。不能不豫爲之防也。然猶可冀幸者。日本海道彎環紆曲。井上馨由東京起程。非十餘日不達朝鮮。不若中國

兵船由煙臺東駛之捷也。儻倭艘與華輪後先偕到。或雖先到數日。而稍有觀望。未及肆毒。猶可措手。中國宜於此時。飄馳電發。爲朝鮮速定內變。內變定而日本無能爲矣。今聞揚威超勇威遠三船已同時起碇。似宜速告吳軍門。不必俟南洋兵船之會集。可先率一二營東渡。直指朝鮮都城。其餘泰安湄雲登瀛洲澄慶等船。及招商局船之運陸兵者。陸續進發。一則迅赴事機。取疾雷不及掩耳之勢。一則使日本朝鮮見我軍絡繹不絕。莫測其多寡之數。此兵法所謂實者虛之。虛者實之也。夫朝鮮之亂。已逾半月矣。近日消息尙無所聞。若彼但

幽其王。奪其柄。未敢顯拒王師。王師既到。宜爲書聲明。專討亂黨。違命敗釁之罪。檄召李是應。赴兵船問狀。彼如挺身來前。或歸罪他人。或飾辭狡辯。宜一概勿理。不動聲色。暫予羈留。先以威遠一船載送來華。致之京師。聽候。

朝命其大隊官兵暫駐朝鮮。爲之捕誅亂黨。不數日而大事可立定。此善之善者也。若李是應伏匿不出。亦不顯然抗拒。宜以代禦外侮爲名。引兵疾入王京。擇地駐營。然後爲之捕治亂黨。嚴究主使。仍遣人開導。是應諭以出則貸其重戾。不出則罪及親族。彼懾於兵威。不敢

不出出則選精卒衛送兵船運赴中國若彼畏罪出奔而亂黨不時出沒官軍一到彼勢自衰可卽擒誅餘黨檄數是應罪狀布告遠近俾所在郡縣執之以獻敢有藏匿者罪之抑或竟挾王出走國都無主宜以大軍代守王京分兵邀截要路稍以精卒驅其後馳檄解散其脅從亦許是應束身歸罪待以不死敢有傷損及王者罪不赦若此則彼勢孤黨散亦必自敗無足深慮也抑或彼竟肆然罔忌矯朝鮮王之命驅煽徒黨授兵登陴力與我抗朝鮮之民久已不覩兵革一聞雄師壓境火器精利莫不氣餒心怯揆彼輿情必莫肯爲之用也是

宜嚴兵城外作欲攻圍之勢。仍檄諭圍城官民示以爲
彼除害不忍玉石俱焚之意。責以擒獻罪人。卽一切勿
有所聞。不出三日內變必作。蓋順逆之理。強弱之勢。固
如此也。若夫罪人旣得。或未及致之中國。而亂黨有劫
奪之慮。不能不便宜從事。則臨以

天朝之威重。以康穆太妃之命。賜之死可也。雖國王不
能爲請也。或罪人旣在兵船。而倭人有邀截之意。則慮
之不可不周。定計宜密。措注宜速。鼓輪疾駛。徑入大沽
可也。雖其黨未必及謀也。然福成所鯁鯁過慮者。則恐
日本兵船先到。而井上馨以狡毒之計行之也。蓋日本

之睥睨朝鮮非一日矣。若井上馨遽以兵船入其國都。或翦除亂黨而并廢其王。或與李是應相合而行廢立之事。或執是應送東京。藉以市德於朝鮮。此三者皆非中國之利也。夫使其翦除亂黨而并廢王也。日本必立其素所親厚者爲王。留兵久駐。號稱保護。漸收權利。爲蠶食鯨吞之計。然彼大勢未定。而中國兵船倏至。亦非其意計所及。中國宜乘此時據理力爭。必使前王復辟而後已。彼見衆心不附。公論不與。而中國兵力又較盛也。必有所怯而徐示轉圜。倘中國持之稍緩。則事機一失。後悔難追矣。如其與亂黨合而行廢立之事也。則其

意將厚其毒而取之中國宜專以討亂爲辭直逼朝鮮若日本出而排解告以中國屬藩之事不願他國與聞朝鮮官民見我勢壯氣盛必有應之於內者如其執送是應於東京也日本必張大其辭夸示諸國以謂朝鮮朝貢中國二百餘年未獲纖毫之助此次削平內難必待日本爲之出兵顯以形中國之短隱以責朝鮮之報非多索口岸卽更立新約此中國所病也然猶幸我軍隨後卽到可以有辭宜致謝日本曰朝鮮係中國屬邦貴國篤念交誼代平其亂感謝弗諉然貴軍勞苦可念搜除亂黨之事當由中國任之如此則稍杜倭人之口

矣。凡此數端，皆隨其機而應之。庶稍化後著爲先著。萬一倭軍雖到，或以兵力未厚，徘徊觀釁，或專理論使館被燬之事，必尙相持未決。中國宜遣使以溫語撫綏倭人，許以亂平之後，諸事可代爲清理。仍出其不意，引軍疾入王京。旣踞上游，則百務可代朝鮮主持矣。日本館人被殺，必索抵償。自不妨以捕斬亂黨爲抵償。人命之用，所謂一舉兩得者也。大抵數千里外，軍情敵勢瞬息千變，原非可豫爲揣測。然相機利導之方，大旨固不離其宗。倘於函致吳軍門時，授以機宜，或有裨益，是否有當，伏惟裁擇。六月二十九日，福成謹上。

光緒八年夏六月初九日朝鮮內亂日本使館被燬倭使花房義質奔還其國十七日日本議遣尙書井上馨督兵船駛往朝鮮制府張公接閱電信謀之幕僚欲函請總理衙門奏明請旨發兵往援余謂輾轉籌商往反之間已五六日若倭兵先到朝鮮彼且虜其王而踞其都如琉球故事事機得失間不容髮請發超勇揚威威遠三兵輪卽日東駛仍函商總理衙門續發陸軍前往制府頗以爲然遣提督丁汝昌道員馬建忠督帶超勇等三艘以二十五日起旋又豫調南洋及招商局輪船以備運送陸兵於是丁

汝昌等以二十七日辰刻抵朝鮮之仁川口。而倭軍亦於是日未刻有一艘先到。僅遲半日耳。見我兵船已先在。爲之奪氣。遂不敢動。倭官與丁軍門等以禮相見。二十八日。日本續到三艘。共水陸兵一千數百名。花房義質以兵五百人駐王京。與朝鮮議約。開列多款。百端要挾。適總理衙門亦奏明派提督吳公長慶率淮軍六營繼往。余遂於二十九日上是書。制府遑之。寄致軍前酌度遵辦。我軍以七月初八日抵朝鮮之南陽府。吳軍門接到此議。閱之大喜。與丁提督馬道密商。意見相同。決計遵行。是時倭使與朝鮮大

員連日會議相持未決頗肆咆哮朝鮮偵知我大軍將到拒之益堅倭使於初十日挈其衆悻悻出王京示將決裂也馬道馳詣倭船告以同心討亂之意而吳軍門遽於十二日親率大軍疾馳至王京駐營倭使不虞我軍之突入也又自覺兵少而勢孤也深悔出京之失計然已無可奈何遂與朝鮮成約尋盟而退惟李昰應尙盤踞王宮亂黨數千日夜營造兵器內外勾結禍且不測吳丁馬三君密定機宜十七日已刻共入王京往拜李昰應以禮周旋申刻昰應來營答拜與之筆談延至日暮以計遣其從者丁汝昌

親率小隊以肩輿擁李昞應就道冒雨夜馳百二十里十八日至南陽海口卽上登瀛洲兵輪鼓輪疾駛解送天津吳軍門親督所部宵攻亂黨盡殲其渠朝鮮之亂乃定

壬午八月識

此事樞紐全在赴機迅捷時則余友黎君蕓齋爲出使大臣駐日本偵得確音急遞密電制府得與僚吏熟籌豫爲之備罔誤機宜余於是役頗盛稱蕓齋爲首功惜乎制府奏事匆促未及特筆爲之表章然其功自不可掩也

又識

答張副都御史書 癸未

幼樵先生中丞閣下。昨奉惠書。敬聆一一。法易政府。寶海撤回。滬上已得電信。此事竟不出去。冬拙議第三條。所慮之中。蓋法人決計吞越。而仍藉辭欲踐甲戌舊約。固由新易政府。然核計法廷定議。濟師已在滇軍撤退之後。滇軍之退。尙在寶海來議之先。洋人電報數萬里外。瞬息相通。彼既窺吾隱情。自無不圖進取之理。當寶海來議之初。未始非秉其政府之意。迨知吾志不在遠略。則悔其從前之失計。遂并寶海撤之。以爲翻改前議。地洋人辦事之狡猾。往往如此。似尙不在政府之易與。

不易也。今籌所以應之之方，則較之往年，更爲棘手。往者以勦辦土匪爲名，隱作疑兵。彼尙莫測吾計所在。今此意已早爲所窺。若再進兵，其勢必至開釁。夫以疲窳積弱，萬不可扶之。越南向又不甚歸心中國，而中國至殫全力以殉之，固爲非計。然使坐視越南之滅，逡巡而不爲之計，且不自爲計，今歲越亡，而明年滇粵告警矣。又事之至可憂者也。竊嘗於萬難設法之中，勉籌應敵，大抵不外三策。今者法人之告我曰：並無與中國爲難之意，欲責越南踐甲戌舊約耳。夫越南本屬中國，而私與法盟，有擅許法人通商滇境之約。彼又始終未告中

國也。爲今之計，莫如仍令滇粵諸軍分紮北圻諸省，作欲進趨東京之勢。且告法人曰：中國欲討越南，擅立私約之罪耳。非與法爲難也。其於越南，則明責其罪，而陰示以保護之意。分導越官，歷聘英德諸國，以布疑陣。撫用劉永福，以聯指臂。法雖濟師，不過千人以外。而中國勁旅一萬數千，彼且勢孤氣餒，號令不能行於北圻諸省。終無以遂其吞併之謀。與通商之志。久之必仍遣使設辭轉圜。然後見風收帆，相機應付。或仍與寶海所議無甚懸殊而後止。此上策也。滇粵各軍分守富良江以北各省，聯絡民團，收用劉永福等，以張聲勢，仍明告法

人以滇境通商非中法條約所有斷不能允萬一越南
爲法所滅中國卽畫江而守猶得披越地三分之一而
法人戀於滇境之通商必仍與中國講解而後罷此中
策也斂兵入關聊固吾圉雖云嚴申儆備徒示怯弱而
已雖以餉械稍資劉永福無異掩耳盜鈴而已究之越
南終爲所滅永福終爲所併而滇粵邊境亦日以多事
此下策也以上三策行之雖稍判難易而後效則顯然
易明若用上中二策則爲之將帥者須審於剛柔緩急
之機其申明紀律奮揚威聲宜仿虞詡增竈之謀其堅
守不戰應變識時宜仿司馬仲達受巾之智此中籌度

殆非易易也。往者伊犁之役，中國調兵設防，決計翻案。而俄約未受大損，琉球割島分隸一事，幾爲日本所給。迨中外合力設法轉移，而利益均霑一條，不至爲倭人所倖得。自有此兩舉，而中國之經理洋務，大有轉機。越南安危，視乎中國措注之得失，實爲中外交涉一大關鍵。然得失愈巨，措注愈難。今欲與強敵相持，挽回全局，則所以伐交伐謀而善其後者，固有無窮曲折。其一切機宜，尙非筆墨所能罄也。初春尙寒，惟爲道自愛，不宣。福成頓首。

上閭尙書書

癸未

年伯大人鈞座。秋間接奉賜書。憂世之心。溢於言表。伏維起居曼福。儀型百寮。抃祝無量。承示戶部歲費支絀。勢實岌岌。竊嘗深惟其故。固由外患漸逼。種種費用。日益浩繁。而漏卮之最大者。則在於養兵。漢唐以前。臨事調發。無事歸農。尙少養兵之費。故其時國計常裕。自府兵廢而兵農始分。數十百萬之衆。坐而待食。故宋明以後。國用恆絀。甚至括財加賦。而事益不可爲。本朝經制之兵。旗綠各營。歲餉用銀約二千萬兩。幾去歲入之半。然綠營之不可用。乾隆以來。

聖訓蓋屢及之。厥後楚淮諸軍，勦滅內寇，皆以勇營著績。近雖節次裁汰，留防之勇，尙需歲餉一千數百萬兩。而綠營餉仍難去，是養兵費加倍矣。邇者西洋種族紛至沓來，恃其船堅礮利，日肆侵侮。中國欲圖自強，於是不得不修礮臺，購火器，不得不設船政與機器局，不得不練水師，造鐵甲船，不得不遣使分駐各國，以結外援，而調敵情。綜計歲費，亦不下一千數百萬兩。而綠營勇營餉仍難去，是養兵費又加倍矣。夫漢唐以前所無之費，宋明以來有其一而已，足以自困。宋明以來所有一倍之費，今則化爲三，而尙未知底止。此固簞蕭所不能

謀陶猗所不能支者也。且今之釐金洋稅合計歲入三千萬兩以外實爲昔年所無。幸稍補苴闕乏。然無事時所出仍浮於所入。有事更無論矣。誠以此時適遭開闢以來未有之奇局。東西洋各國方日務製器通商開礦。其嗜財如性命。用財如泥沙。及至用兵。雖糜餉數千萬億而不惜。中國綢繆武備斷不能如各國之耗費。然爲事機所迫。竟有欲罷不能之勢。今於三大宗之中。如去綠營則數百年舊制似難驟改。如去勇營則所留實多。百戰之餘。今皆分扼要隘。彈壓土寇。撤之則更虞單弱。各省所稱無可裁減。似非盡虛辭搪覆也。至於并禦外

侮則築礮臺練水師治火器最爲當務之急所費尤難減省然則今之時勢誠如鈞諭所云萬分無計者矣顧福成於窮極思變之時審度事理必不得已或者裁減綠營乎昔胡文忠公有言凡染宦場與綠營習氣者文武二塗萬無可用只宜屏棄蓋以二百餘年之流弊積重難返雖欲整理而無由也夫勇營固不能無窳弱之弊然或易一將而壁壘更新或募一旅而旌旗變色非若綠營之不能振作綠營旣決然無用則是空養游惰六十萬人坐耗歲餉二千萬兩將何以堪爲今之計惟有淘汰綠營而於勇營及海防諸務亦仍精心綜覈綜

覈之法祇可視督撫爲何人而可否之。督撫有如曾文正胡文忠諸公者。所請雖一概照行可也。督撫有如英西林文質夫諸公者。所請雖一概痛駁可也。至各省綠營近來發餉有八九成者。有六七成者。雖尙未能盡裁。若再普減兵額二成。每歲可省餉三百萬兩。普減三成。每歲可省餉四百數十萬兩。以十年計之。則四千餘萬矣。得此一項擲節。尙可稍紓財力。若謂經制之兵減之恐冒不韙。則前哲所論。與時勢所趨。確有明證。專賴有大識大力。卓然不惑於流俗者。起而變通之。庶以匡維全局。今又適值鈞座兼掌兵部。此固難得之機也。或

又謂緣營過單則護餉解犯捕盜諸差恐難應手不知僅減二三成於諸差尙可無誤且有勇營駐紮之處不妨責令分任其勞其汰之之法但令各省於營兵之老死者緣事革退者勿復募補則兩三年內必可減去三成矣營兵旣減營中將弁舊額亦須酌裁以昭覈實或稍撥補勇營與海防諸營之缺至於添練輪船水師之處其原設艇船水師亦少實用可漸裁也夫沿海各省原設水師承平時久多廢弛或專恃洋煙妓博各種規費以餬口或船已朽爛無存將弁尙按期支領修船造船經費視爲本署入款此等有名無實之費似宜設法

查驗大加裁減務稍撥補輪船水師之餉他若長江內河各舳板水師爲扼守江河汊港之用曩歲肅清江面深得其力此則當仍舊貫者也因鈞諭殷殷垂詢輒敢發其狂瞽之論未知可備采擇否冬深驟寒惟爲道爲民珍重不宣十一月二十七日福成謹上

代李伯相答彭孝廉書

丙子

孝廉足下。頃接惠函。就諗文祺休暢。榮問日新。爲頌。煙臺一役。議結滇案。暫以釋外憾。而戢戎心。然此事錯誤在前。鄙人勉強了結。殊未慊心。過蒙揄獎。祇增慙慙。來書援引古今。推究形勢。謂中國之洪荒。以聖人制度文物。闢之外國之洪荒。以火輪舟車機器電報之類。闢之崇論閎議。於中外大局。洞若觀火。足破拘墟之見。嘗謂自有天地以來。所以彌綸於不敝者。道與器二者而已。開闢之初。生民渾噩。所需於世者。蓋寡。其後不能無以自養。不能不相往來。卽不能無爭鬪。聖人者出。於是有

耒耨之教有舟楫之利有弧矢之威其風氣所趨不能
不然者道也而道之所寓者器也數千年來土宇日闢
智巧日生吳楚秦越昔之所稱戎蠻者今皆爲中原腹
地匈奴突厥昔之常作邊患者今卽是蒙古外藩而天
復使泰西諸國研精器數以通我中華於是有農織之
機器有火輪之舟車有洞鐵之槍礮蓋中國所尙者道
爲重而西人所精者器爲多然道之中未嘗無器器之
至者亦通乎道設令炎帝軒轅復生乎今世其不能不
從事於舟車槍礮機器者自然之勢也今之議者動引
古聖啜糟粕而去精華務空談而忘實踐失之彌遠欲

求馭外之術。惟有力圖自治。修明前聖制度。勿使有名無實。而於外人所長。亦勿設藩籬以自隘。斯乃道器兼備。不難合四海爲一家。蓋中國人民之衆。物產之豐。才力聰明。禮義綱常之盛。甲於地球諸國。旣爲天地精靈所聚。則諸國之絡繹而來合者。亦理之固然。來書謂世界日開。其機自外國動之。其局當自中土結之。實爲遠識至論。其效卽不在今日。亦當見諸千百年後也。因執事留心世務。故略抒一二。復頌元祺。不具。某頓首。

伯相評云。精鑿不磨之作。

贈陳主事序 壬申

天地之變。遞出而不窮者也。有大智者。燭幽闡微。與時推移。以御厥變。則天下被其休。否則。瞢無適從。敝敝焉。執故常之見。以與世變相遷。而變乃環起而不可止。自有天地以來。清淑純靈之氣。之所鬱積。神聖君師之所經營。而垂法。恆在中國。其外去中國益遠。則紀載有所不及。詳焉。莊生有言。六合之外。聖人存而不論。六合之內。聖人論而不議。夫聖人之智。豈不能閎覽而遐矚哉。蓋其時。舟車有所不通。重譯有所不達。幸而荒邈隔絕。不必鑿空騁奇。俾外人抵隙以入。譬之人理。其一心而

百體順從。不令自應。中國者。天地之心也。變之未至。聖人所能防也。然而天下之生民已久。機巧日以繁。而風氣日以闢。勢之所至。變且隨之。

國家德威遠暨。北窮大漠。西跨葱嶺。凡昔苴蠻貉羯羌回之族。能爲中國憂者。皆囊括而箠使之。邊圉之益斥。已大變於古矣。近者泰西諸國。競智爭雄。器數之學。日新月異。其權至能制御水火。驅駕風電。恃其焱銳。遑數萬里。矚我中國。中國震於所不習。罔知所措。其始僉議驅攘地廣師疲。輒爲所乘。得勢益逞。徵求無厭。中國欲力與之軋。則羣敵聯盟。協以謀我。欲嚴與之絕。則備多

力分難以持久。於是議立約章。歲益加增。瀕海之衝。設關互市。通都下邑。廣傳彼教。時則華戎錯沓。動生釁尤。浸尋蔓延。厥憂未艾。而彼諸國。方乘時逐利。牽率以至。浩乎如大江洪河之東注於海。終古不可復分。此殆天地自然之勢。雖天地不能自爲主也。變之驟至。聖人不能防也。雖然。中國之變已亟矣。爲政者將謀善其後。則不可無御變之道。今之士大夫。習聞春秋攘夷之說。頗疑海外絕域。非儒者所宜道。其尤者深曠太息。以謂中外交接之事宜。一掃刮絕去。援引古昔。用相訾警。夫疾疢之在身。暴客之伺睨而入室。人孰不惆焉惡之哉。

惡之益篤則不能不儲藥石戒守備以漸所以自全者
今諱疾而遷忌於醫甚寇而不知所以禦之吾恐變患
之無窮期也夫變已深而抗之過激以僨事者躁也坐
視而不豫爲之謀者玩也欲求御變之道而不務知彼
知己者瞶也方今海外諸國力與中國競者曰英曰法
曰美曰俄曰德其他往來海上無慮數十國中國之情
狀彼盡知之矣而其器械之精輪艦之捷又大非中國
所能敵中國所長則在秉禮守義三綱五常犁然罔斲
蓋諸國之不逮亦遠焉爲今之計莫若勤修政教而輔
之以自強之術其要在奪彼所長益吾之短并審彼所

短用吾之長。中國之變。庶幾稍有瘳乎。同治十一年春。相國毅勇侯曾公。肅毅伯李公。奏遣刑部主事陳先生。蘭彬。蒞秋。率童子若干人。出赴亞墨利加。究習西學。期以十九年來旋。先生年已逾艾。毅然無難色。蓋先生兼文武才。而識閎氣沈。欲爲中國建無窮之業。其素志也。他日勉諸童子。卒業而歸。以傳中國。并識諸國形勢風俗性情之所宜。而知所以御之。縱收效不於其躬。後之人必有言其成者。抑予更有言者。先生所攜皆童子。童子志識未定。去中國禮義之鄉。遠適海外。鬻利朋淫腥羶之地。歲月漸漬。將與俱化。歸而挾其所有。以誇耀中。

國則弊博而用渺爲之傳者其必有逆睹其弊而善爲防閑者邪然則先生此行務畢究洋人之所長更善察洋人之所短可也予與先生相知也久於其行不能無言以贈故敘其臆見如此而於遠行惜別之情則從略焉知先生不以此爲苦也

送王協亭西征序

王申

回教興於西域逾千二百年流博而勢益彊其說澶漫僻窳其人率外柔內鷙匪毗觸迕必報乃已雖天性之傲狠亦其教如此也自唐之世回人稍稍東徙散入州郡宗其遺教不變曩者

國家以全盛之力戡定西域凡回部之隸中國者什有三四而種族來者滋益多於是自潼關以西訖於河湟之境北並塞垣抵玉門南踰劒閣跨滇池之南皆回人之所錯居與齊民齒習尙既殊客主違言積釁韜疑以相忤恨官不能理則惟其競者是右訟獄滋豐譌言朋

興尋仇不已。相訐益劇。雲南先變。而秦隴繼之。彼回人者。哀嘯羣醜。奮兵四起。焱迅雲賊。不可復制。其屠燒攻剽之燄。殆與粵寇相和應。今粵寇已夷。而回人叛者。疊被芟刈。其氛亦漸滅矣。創痍逋迸。不患鑒之不勝。其餘衆畏威悔禍。必且相率就撫。撫之而其教不能驟變。則其心仍與吾民貳。吾民追思前忿。其侵之也。必加厲。往復相激。則變故復生。此必至之勢也。竊意當此之時。宜乘兵威。鋤其桀猾尤無良者。而貰其馴弱者。與之更始。剗去哇畛。選擇賢吏。誘令革其舊俗。浸淫漸摩。歲月益異。庶回人漸化其傲狠之性。而去其尋仇之習。自茲以

往患其少休爲是說者其效雖若迂遠而難斬然值此廓清之會設謀張法宜可乘時更新稍一不慎則不免釀憂而爲他日悔湖南王君鎮塘協亭佐侯相曾公幕府六七年一旦奮然長征將赴隴右參京卿劉公軍事劉公之軍皆百戰勁卒威聲震海內其成功可坐而必軍謀變化予不能以遙揣至若事後綏馭之宜雖聖人有不能易予故持是與協亭別俾以貢於當事諸公而加意焉且試質諸協亭其果以爲然乎否也協亭侯相甥也往當粵寇之難其同邑雄駿魁閎之士皆由布衣致大用茲者據其所蓄與其嚮所飫聞於舅氏者以夷

難而拯厄功名之大顯可計日待也協亭勉之哉予又聞玉門以西西域之地回人不靖別城往往陷沒他日隴右耆定

朝廷必命移兵討之協亭儻以其時膺闕外之寄參予說而施之或亦綏輯之一助也然回人堅忍尙詐多反覆進止機宜不可不審予贈子止於此矣無錫薛福成序